



Signôr ti prei, dismonte de tô crôs, no tu podis pì stâ lì, no tu viodis che nancje chel simbul no nus jude a fâ nus diventâ plui bogns, a cressi.

Chê maluserie che simpri pì di spès nus strenç, nus cjòl il flât, di dulà vegnie? E il sospiet che il to calvari al sedi dome strade par cui che al è ormai scunît, par cause di chês vôs che lu doprin par falù vivi dome a chei altriis.

I vin bisugne, tante bisugne, che tu tornis a cjaminâ cun nô, tal mieç di nô, che tu nus dedis la man come la mari al so picinin.

Daspò chês man, metile sul cerneli di cui ch'al à i voi sledrosâts, di cui ch'al patìs dulîs, sudizons, sotanancis di ogni sorte, de bande di cui ch'al à metût tal cûr, un telecomant simbul dal podê dal nestri timp, crodint cussì di campâ par simpri e fâ i siei comuts, propit ta une dimension là che il soreli al vâ a mont ogni dì.

Lui come ducj nô, al varà di dismontâ di chel tren che nus à quartât fin chi, ta chest viaç che nus è tocjât di fâ, compagnâts di un fagot cualchi volte pesant, che dome tu, tu podis savê

trop pesant ch'al pues jessî.

Torne jù, ven chi, scjalde i nestrîs cûrs inglaçâts, forsit cussì ti torne la voie di restâ chenti come cuant che o jerin fruts e o vevin ancjemò la fuarce di crodi. Ancje par fâ in mût che tu tu puedis perdonânus, pal fat che cumò, ta un timp tant grivi, no rivin a sintîti dongje come ch'o varessin.

Nus reste ancjemò une piçule sperance, che il to capî al rivi ancje a intindi, che no simpri une blesteme e je une blesteme, come une preiere no je simpri une preiere. Al capite, al di là di ogni crodi, che lis dôs formis di espression a si tocjedin, ancje se no pâr vere, viôt tu ce che tu âs di fâ, il nestri cjalâ al è in spiète di une sfere di lûs.

Lûs che tu nus vevis prometude, ma che cualchidun nus al à robade, o s'e sin lassade robâ. Cumò ti preìn come chei doi viandants che za fa timp ti vevin incrosât dilunc di chê strade e come lôr ti disin di cûr: - Signôr no stâ lâ vie, reste cun nô, ch'a stâ vignint jù la gnot.

di Marisa Gregoris

#988